

Akileraarusiinernik Aalajangiisartut aalajangiinerat

Kinaassutsimik uppersaaneq:	2025-6253
Aalajangiisoqarpoq:	22. Oktobari 2025
Aalajangiinerup tamanut saqqummiunneqarnera:	15. Marsi 2026
Ukiut aningaasarsiorfiusut:	2023
Qulequtaq:	Akileraarutit
Sammisami oqaatsit atorineqartut:	Sungiusaasutut ilinniartitaanermut aningaasartuutit

Eqikkaaneq

Maalaarut sungiusaasutut ilinniarnermut 53.000 kr.-inik aningaasartuutit tunngasuvoq. Isertitaqarfissamik pilersitsinermut aningaasartuutit ilanngaatigineqarsinnaasutut aningaasartuut Akileraartarnermut Aqutsisoqarfimmit isigineqarsimanngilaq.

Maalaaruteqartoq isumaqarpoq aningaasartuutit ilanngaatigineqarsinnaasut.

Namminersorluni suliffeqarfiani ingerlatsinermi aningaasartuutit imaluunniit atorfinitsinneqarneranut atatillugu akissarsianut aningaasartuutit.

Aningaasartuutit ilanngaatigineqarsinnaannginneri Akileraarusiinernik Aalajangiisartut aalajangiussimavaat.

Maalaaruteqartoq suliffeqarfimmi isertitanik suli pissarsisimanngilaq aningaasartuullu taamaattumik suliffeqarfimmi ingerlatsinermi aningaasartuutit ilanngaataasinnaasutut isigineqarsinnaanani. Aamma aningaasartuuteqarnerup aamma akissarsiorfiusut ukiumi isertitanik pissarsinerup akornanni pisariaqartumik atassuteqartoqarnera uppersarneqarsimanani. Aningaasartuutit taamaattumik akissarsianik isertitaqalernermi ingerlatsinermi aningaasartuutit ilanngaatigineqarsinnaasutut isigineqarsinnaanngillat.

Suliassami pissusiviusut

Maalaaruteqartoq peqqinnissaqarfiup iluani ulloq naallugu atorfeqartuusimavoq. Oktobarip aallaqqaataani 2023-mi namminersortutut suliffeqarfiuteqartutut nalunaarsugaalerpoq.

2023-mi naatsorsuutini allanneqarsimasutuaq tassaasimavoq ingerlatsinermi aningaasartuutit 53.000 kr.-it aamma 2024-imi ingerlatsinermi aningaasartuutit 49.500 kr.-it Ukiumi isertitaqarfiusuni marlunni kaaviiartitatu allanneqarsimapput 0 kr.

Aningaasartuut 53.000 kr.-it sungiusaasutut ilinniarnermut tunngasuvoq, september 2023-mi naammassineqarsimasutut angusiffiusimasutullu uppersarneqartoq.

Maalaaruteqartup allagartartaarnermi uppersaataa malillugu....."atuagarsornikkut sulinernullu qaffasissumik 155 tiimini atuartinneqarnerup naammassineqarnerani sungiusaasutut ingerlatsisinnaasutut sungiusarneqarsimaneq soraarummeersimanerlu. Iitersuisoqarluni 10 tiimini sungiusarneqarneq piukkunnaateqartumillu utersaarfigineqartarluni arfinileriarluni sungiusaasutut malinnaaffigineqarluni.

Sungiusaasoq tassaannngilaq taaguut illersorneqartoq. Kikkut tamarmik sungiusaasutut nammineq taagorsinnaapput, kisianni sungiusaasutut allagartaqarneq ilinniarnermik ingerlataqarnermik malinnaaffigisamik uppersarneqarsinnaalluni.

Naammagittaalliuuteqartup paasinninnera

Maalaaruteqartoq isumaqarpoq sungiusaasutut aningaasartuutit ilanngaatigineqarsinnaasut, tassa:

- suliffigisassatut aqquq nutaajungimmat (pilersitsinermi aningaasartuutit)
 - Pilersitsinermi aningaasartuutit tassaaneruserput suliffeqarfimmik imaluunniit inuussutissarsiummik nutaamik pilersitsinermi aningaasartuutit.
 - Aningaasarsiuutigisaminik suliffeqareerpoq sungiusaanerlu piginnaasami annertusinissaanut atorlugu.
- Maalaaruteqartup maannakkut suliffigisaanut suliaqarfigisaanullu piginnaasat kivinnissaanut aningaasartuutit (ingerlatsinermi aningaasartuutit)
 - Napparsimasunut, innuttaasunut ilaqutariinnullu ilitersuilluni, siunnersuilluni tapersersuillunilu suliaqarpoq sungiusaasutullu ilinniarneq tassaalluni toqqaannartumik piginnaasat annertusineqarneri, suliap ingerlassinnaaneranut pitsaanerumillu siunnersuisinnaaneranut piginnaasaanik pitsaanerulersitsisoq.
 - Sungiusaanermi tunngaviit napparsimasunik innuttaasunillu oqaloqateqarnermi atorneqartarput, taakkulu sulinermi inissisimanagera nukittorsarlugu.

Inatsisitigut malittarisassanut inatsisillu tunngavigalugit sulinermit innersuussinerit

Ingerlatsinermi aningaasartuutitut ilanngaatit pillugit:

Ingerlatsinermi aningaasartuutitut ilanngaatit aamma uuma ataani nalikilliliiffigineqarnertut pingaarnertut inatsisitigut tunngavigineqartut Aningaasarsianit akileraarutit pillugit Inatsisartut inatsisaat nr. 12, 2. november 2006-imeersumi § 24-imi nassaarineqarsinnaapput

§ 24. Aningaasarsiat akileraaruteqaataasussat naatsorsorneranni ilanngaatigineqarsinnaapput:

1) Ingerlatsinermi aningaasartuutit, tassa imaappoq aningaasarsiat piniarnerannut, isumannaarnissaannut allanngutsaaliorniarnernullu ukiup ingerlanerani atorneqarsimasut, taakkununga ilanngullugit akileraartarnermi nalikilliliinerit. Akileraartarnermi nalikilliliinerit maleruagassiat aammalu pigisat nalikillilerneqarsinnaasut allamut tunineranni il.il. iluanaarutit annaasaqaatilluunniit akileraartarnermut tunngasumik suliarineranni maleruagassat naalakkersuisut aalajangissavaat, 2) aningaasat akileraartussaaitap pigisaanik, iluanaarutitaat aningaasarsiatut isigineqartunik, allanngutsaaliuinermit sillimmasiinerimulluunniit atorneqarsimasut, aammalu 3) akiitsut erniaat, taakkunungalu atatillugu sullissinermit matusissutissatut ingerlaavartumik ernialiuttakkat (løbende provision).

Ingerlatsinermi aningaasartuutitut ilanngaatit pillugit inatsimmut tunngavigineqartumut nassuiaatit inatsimmi aalajangersakkap imarisaanik nassuiaapput:

Aalajangersagaq akileraarutitigut aningaasartuummut taaguummumut tuungavissiivoq.

Aningaasartuutit ukiup ingerlanerani atorneqarsimassapput. Ukioq innersuussutigineqartoq tassaavoq ukioq aningaasarsiorfiusoq, tasanilu allanneqassallutik, piffissaq naatsorsuiffiusumi malittarisaq pingarneq tassaavoq qaammatinu aqqaneq marlunni piffissaq. Aningaasartuut qaqugu atorneqassava, aningaasartuutit suussusianut piffissalersuisarnermi tunngaviusut atuuttut apeqqutaapput. Aningaasartuut ukiumut aningaasarsiorfiusumut attuumassuteqassasoq piumasaqaataangilaq, tamanna pillugu aningaasartuut ukiumut aningaasarsianut sunnuteqaangilaq imaluunniit aningaasat aningaasartuutitut matusissutaasussat ukiumut aningaasarsiorfiusumit aallaaveqassapput.

Tamanna pillugu nammineq inuttut aningaasartuutit avataaniipput, soorlu nerisassat atisallu aamma ineqarnermut akiliummut assigisanulluunniit aningaasartuutit. Aammattaaq aningaasartuutit suliffeqarfimmik pilersitsiniarnermut siunertaqartut, avataaniipput, taamatullu suliffeqarfiup atorunnaarsinneranut aningaasartuutit.

Kisianni aningaasartuutit, suliffeqarfimmi maannakkut pissusiusunut siunertaqarpata, ingerlatsinermi aningaasartuutit ilanngaatigineqarsinnaapput.

Ilanngaateqarsinnaanermut piumasaqataavoq, aningaasartuut aningaasarsiarlu imminnut qanimut attuumassuteqassammata, pissutigalugu aningaasartuut aningaasarsiniarnermut atorneqartussaammat. Matumuuna aningaasartuutip aningaasarsiallu akornanni atassuteqarneq piumasaqaataanera, eqqartuussisarnermi suleriaatsimi imatut oqaatigineqarpoq, atassutseqaat soorlu aalajangersimasuulluni erseqqilluniluunniit, ersarilluni paatsuugassaanilu, toqqaannarluni, qanilluni imaluunniit erninnaarluni.

Piumasaqaammi pineqarpat, pissarsiniarnermut, aningasarsiornerup ataatsimoortinnissaa qulakkeerniarlugu atatinniarlugulu aningaasartuutit atorneqassasut, ingerlatsinermit aningaasartuutit oqaatigineqartuni takuneqarsinnaavoq, akerlianilli aningaasarsiat pisuussutinipput inuullu namminerisaminik atuinerani, taamaattumillu pissarsiniarnermut, qulakkeerinermit pisuussutillu ataatiinnarniarnerinut inuullu namminerisamik atuinera ingerlatsinermit aningaasartuutinut ilanngaatigineqarsinnaanngillat.

Oqaaseq aningaasarsiat isertitanut akileraarusigassaanut taamaallaat innersuussivoq, aamma isertitanut akileraarusigassaanngitsut pinnagit, taamaattumik aningaasartuutit pissarsiniarnermut, qulakkeerininnermit pigisanullu allanngutsaaliuinermit atukkat, akileraaruteqartinnagit tunineqarsinnaasut, ilanngaaserneqarsinnaanngillat.

Oqaaseq ingerlatsinermit aningaasartuutit piumasaqaammit imaqarpoq, aningaasartuutit ingerlatsinermit, aningaasarsiniarnermit soqutigisallu akilernerqassasut, aamma nammineq atuneq pinnagu. Tamanna pillugu tunngaviuvoq imaluunniit piumasaqaataavoq tamakkiisumik ilaannakuusumilluunniit ilanngaateqarnermit, inuussutissarsiutigalugu suliaqarnermi imaluunniit inuussutissarsiuteqarnermit tunngasunik siunertaqarluni suliaqarnermi aningaasartuut akilernerqartoq, imaappoq suliaqarneq, imatut siunertaqartumik, tassami ungasinnerusoq isigalugu tassaavoq, ilanngaateqareerluni sinneqartoorutinik iluanaarniarneq.

Nassuiaatini takuneqarsinnaavoq, ilanngaateqarnissamut aningaasartuutit akilernerqartut ukiumullu aningaasarsiat ataqatigiissasut piumasaqaataasoq. Ataqatiginnerat erseqqarissuvoq, assersuutigalugu kaaginic tuniniaasoqarnerani pisisoqartillugu qajuusat sioraasallu aningaasartuutigineqassapput. Kisianni aningaasartuutit allat, soorlu assersuutigalugu hotelimi najugaqarneq biilinillu attartorneq ukiumut aningaasarsianut toqqaannartumik atassuteqanngillat. Matumani aningaasartuut inuussutissarsiutigalugu aningaasarsianut attuumassuteqarnerasoq nalilersorneqassaaq. Assersuutigalugu arnanut nujalerisoq ukiumi nutsani atugaalersuni killuinermi pikkorissarnermit aningaasartuuteqarpat, taava ilanngaatigineqarsinnaassaaq. Piginnaasat pioreersut nutarterneqarput. Akerlianilli qimmit meqqorissarnissaanni pikkorissarnermit aningaasartuuteqarneq ilanngaatigineqarsinnaanngilaq, tassa qimminik killuineq arnanut nujalerisutut isertitanik pissarsinermit atassuteqanngimmat. Kiisalu aningaasartuut isertitat tunngaviannut (pisuussutit) tunngappata ilanngaatigineqarsinnaanani, tassa tamanna ukiumi isertitanut toqqaannartumik atassuteqanngimmat. Assersuutigalugu arnanut nujalerisoq qimminik killuinermit allagartartaarniarluni aningaasartuuteqarluni, nujaleriffinni pigalugulu qimmini killorusukkamiuk, taava tamanna siunissami isertitaqarfiusumik ingerlatamik nutaamik suliffeqarfiup annertusineqarneratut isigineqassaaq (isertitatigut tunngaviup annertusineqarnera - nutaanik piginnaasaqarlerneq).

Maalaaruteqartup sungiusaasutut ilinniarnerninut 53.000 kr.-inik aningaasartuutini nammineq suliffeqarfimmini ingerlatsinermi aningaasartuutit allappaa. Ukiuni isertitaqarfiusuni 2023-mi aamma 2024-mi suliffeqarfimmi kaaviiartitaqanngilaq. Suliffeqarfimmi kingorna ineriartortitsisoqarsimaneranik ilisimannittoqanngilaq.

Suliffeqarfimmik ingerlatsinermi aningaasarsiat pissarsiarineqartut aningaasartuuteqarfignerannut ilanngaateqartoqartarnera tunngavitigut piomasqaataavoq. Maalaaruteqartup suliffeqarfiani isertitanik pissarsisoqarsimanngimmat suliffeqarfik suliffeqarfittut ingerlasutut isigineqarsinnaanngilaq. Taannarpiaq tunngavigalugu suliffeqarfiup aningaasartuutaannut ilanngaateqartoqarnissaa akuerineqarsinnaanngilaq.

Tamatuma kingorna apeqqutinngorpoq akissarsianik isertitanik maalaaruteqartup pissarsineranut atatillugu aningaasartuutit aningaasartuutit isigineqarsinnaanersoq. Akissarsiortup aningaasartuutini aamma ilanngaatigisinnaavai, akissarsiortup akissarsianik isertitaqarnissamut taakku aningaasartuutigisimagunigit. Aallaaviatigut aningaasartuutit taamatut ittut akissarsiortumit qaqutigooortumik aningaasartuutaasarpup, tassa sulisitsisup soqutigisarimmagu atorfeqartut pikkorissarnernut il.il. neqeroorfigineqartarnissaat, taamaalillutik suliassatik isumagisinnaallugit. Taamaattumik atorfeqartut piginnaasaannik nutarterinermut kivitsinernulluunniit aningaasartuuteqartut tasaaneruserpup sulisitsisut.

Maalaaruteqartup maalaarummini tunngalersuutigaa sungiusaasutut ilinniarnerni aningaasartuutaasut peqqissaasutut sulinermini iluaqutissaasut. Akissarsiortutut sulinermini sungiusaasutut ilinniakkamini ilisimalikkani atorluarsinnaagai assortorneqarsinnaanngilaq. Taamaattorli aningaasartuutigineqartut ingerlatsinermi aningaasartuutit toqqaannartumik ilanngaasertussaataaannngillat.

Maalaaruteqartup sungiusaasutut ilinniagaqanngikkallarnernituulli akissarsiaqartinneqarnini assortussappagu, sungiusaasutullu piginnaasani naapertorlugit akissarsiai qaffassimangippata, tamakku aningaasartuuteqarnermut ukiumullu inuussutissarsiornermut aningaasarsianut attuumassuteqanngillat. Sungiusaasutut ilinniagaqarnerup malitsigisaanik maalaaruteqartup sulinerata allanngornera pillugu paasissutissiisoqanngilaq.

Maalaaruteqartoq sungiusaasutut ilinniarnerni piginnaasanik nutaanik pissarsisimappat, allagartartaarluni ilinniagaq naammassinagu pissarsiarisinnaanngisaminik akissarsiortutut allamik suliaqalerluni, taava aningaasartuut isertitanut tunngavittut aningaasartuutit ilanngaatigineqarsinnaanngitsutut isigineqassaaq.

"Sungiusaasoq" taaguutaanngilaq illersorneqartoq, kisiannili sungiusaasutut ilinniarnerni allagartartaarluni uppersaateqarnerup kingunerisaanik uppersaatep pissarsiarineranut aningaasartuuteqarneq piginnaasanik uppersarneqarsinnaasunik nutaanik pissarsinermut aningaasartuutit isigineqartariaqassaaq aamma maanna sungiusaasutut piginnaasaareersut nutarterneqaannarnerisut igineqarnani.

Akilerartarnermik aalajangiisartut aalajangiinerat

Ukiuni isertitaqarfiusumi 2023-mi Sungiusaasutut allagartamik uppersaammik pissarsinermut 53.000 kr.-inik aningaasartuuteqarnerup ilanngaatigineqarnissaanut Akilerartarnermut Aqutsisoqarfiup itigartitsinera aalajangiussimaneqarpoq. Taamaalilluni maalaaruteqartup Akilerarusiisarnernik Aalajangiisartunut naammagittaalliutaa ilalerneqanngilaa.

Inatsisitigut tunngavigisat: § 24 aningaasarsianit akileraarutit pillugit Inatsisartut inatsisaanni nr. 12, 2. november 2006-imeersoq kingusinnerusukkullu allannguuteqartoq.